

Privredno društvo za proizvodnju i transport gasa

"BH-Gas" d.o.o. Sarajevo

Broj: 06-1-308-35/26

Sarajevo, 10.08.2026.

Na osnovu člana 69. stav 3. Zakona o javnim nabavkama BiH (Sl. glasnik BiH br. 39/14, 59/22) člana 51. Statuta i člana 29. i 31. Pravilnika o nabavci roba, radova i usluga BH-Gas d.o.o. Sarajevo, Ugovorni organ donosi,

ODLUKA

o poništenju postupka javne nabavke

Član 1.

Poništava se postupak javne nabavke Izrada studije izvodljivosti za projekat gasifikacije sjevernog dijela Federacije Bosne i Hercegovine, broj obavještenja: 876-1-2-41-3-23/25 od 06.03.2025. godine, putem otvorenog postupka.

Član 2.

Shodno članu 70. stav 6. Zakona o javnim nabavkama BiH, Odluka se objavljuje na portalu javnih nabavki kao i internetskoj stranici BH-Gasa.

Član 3.

Ova odluka stupa na snagu danom donošenja.

Obrazloženje

Privredno društvo za proizvodnju i transport gasa „BH-Gas“ d.o.o. Sarajevo (u daljem tekstu: Ugovorni organ) pokrenulo je postupak javne nabavke usluge:

„Izrada studije izvodljivosti za projekat gasifikacije sjevernog dijela Federacije Bosne i Hercegovine“

objavljivanjem Obavještenja o nabavci broj 876-1-2-41-3-23/25 od 06.03.2025. godine.

Predmetna javna nabavka pokrenuta je radi pribavljanja stručne dokumentacije koja bi predstavljala osnov za dalji razvoj projekta gasifikacije sjevernog dijela Federacije Bosne i Hercegovine, a u skladu sa tada poznatim obuhvatom projekta, trasom i planskim parametrima.

U provedenom postupku javne nabavke zaprimljene su ponude ponuđača, izvršena je evaluacija ponuda, te je donesena Odluka o izboru najpovoljnijeg ponuđača broj: 06-1-308-29/25 od 20.02.2026. godine.

Protiv navedene odluke izjavljena je žalba, nakon čega je Kancelarija za razmatranje žalbi Bosne i Hercegovine donijela Rješenje broj: JN2-03-07-1-400-8/26 od 05.06.2026. godine, kojim je žalba usvojena, poništena odluka o izboru najpovoljnijeg ponuđača i predmet vraćen Ugovornom organu na ponovni postupak.

U periodu nakon pokretanja predmetnog postupka javne nabavke nastupile su značajne okolnosti koje utiču na predmet i obim planiranog projekta.

Naime, donošenjem Zakona o izmjenama i dopunama Zakona o južnoj interkonekciji Bosne i Hercegovine i Republike Hrvatske („Službene novine Federacije BiH“, broj 29/26), došlo je do izmjene zakonskog okvira kojim se uređuje razvoj gasne infrastrukture u Federaciji Bosne i Hercegovine.

Navedenim izmjenama izvršeno je drugačije normativno pozicioniranje pojedinih pravaca razvoja gasnog sistema, pri čemu je dio trase koji je ranije bio obuhvaćen razmatranjem u okviru projekta sjeverne interkonekcije – pravac Kladanj–Tuzla – uključen u obuhvat projekta južne interkonekcije.

Slijedom navedenog, obuhvat projekta za koji je pokrenuta predmetna javna nabavka više nije identičan obuhvatu koji je postojao u trenutku izrade tenderske dokumentacije i pokretanja postupka.

Ugovorni organ je dužan postupati u skladu sa načelima javnih nabavki, posebno načelima efikasnog i racionalnog korištenja javnih sredstava, obezbjeđenja svrsishodnosti nabavke i postupanja u skladu sa stvarnim potrebama ugovornog organa.

Uzimajući u obzir navedene izmijenjene okolnosti, Ugovorni organ je izvršio ponovnu analizu opravdanosti nastavka predmetnog postupka javne nabavke, te utvrdio da bi nastavak postupka u postojećem obliku doveo do pribavljanja dokumentacije koja ne bi u potpunosti odgovarala novom obuhvatu i potrebama projekta.

Naime, predmetna studija izvodljivosti treba biti izrađena na osnovu jasno definisanog tehničkog, prostornog i infrastrukturnog obuhvata projekta. S obzirom da je nakon pokretanja postupka došlo do izmjene osnovnih parametara projekta, nastavak postupka prema postojećoj tenderskoj dokumentaciji više ne bi osiguravao ostvarenje svrhe zbog koje je postupak prvobitno pokrenut.

Ugovorni organ cijeni da se radi o objektivnim okolnostima koje nisu postojale u trenutku pokretanja postupka javne nabavke, niti su posljedica postupanja ili propusta ugovornog organa, već predstavljaju posljedicu izmjene relevantnog zakonskog okvira i planskog pristupa razvoju gasne infrastrukture.

Imajući u vidu navedeno, Ugovorni organ smatra da nisu više ispunjene pretpostavke za nastavak predmetnog postupka javne nabavke, zbog čega je odlučeno kao u dispozitivu ove odluke.

Pravna pouka

Protiv ove odluke može se uložiti žalba u skladu sa odredbama člana 101. Zakona o javnim nabavkama. Žalba se podnosi neposredno na adresu ugovornog organa: BH-Gas d.o.o. Sarajevo, Obala Kulina bana 8/III, 71000 Sarajevo, u najmanje 3 (tri) primjerka.

Dostaviti:

- ekonomsko-finansijskom sektoru
- ponuđačima
- a/a

IZVRŠNI DIREKTOR

Edis Baković, dip.ing.maš.

UPRAVA BH-GAS D.O.O.



DIREKTOR

Dževad Bećirević, dipl.ing.maš.